

## ■ GLOSSA

# Davent è davent

DA SILVIO CAMENISCH

Nus (betg nus qua, nus essan schon endretg) nus Monsieur le président avessan mussà gugent noss premier bébé a noss ex-ami Muammar disturbà. Quantas giadas essan nus ans embratschads da fratelli cumpani, bütschuns sin bucca, essan stads da cumpania en sias tendas da milliedinanotg en il desert, sias tendas èn stadas nossas tendas, dador tarments stemprads da sablun, ma dadens, dadens avain nus bavì e mangià sco dieu en Frantscha: da buffar e schluppar e tut quai che tutga tiers. Tgi ch'ha vis il film franzos da success La grande bouffe (strigentamain a p. d. 18 onns!) sa co che nus manegiain.

Nus il primminister il Cavaliere essan da l'avis sco noss ami Sarkozy e noss'amia Angela. Nus avain gea tantas amias, in-summa. Uss ch'el è davent, davent è davent, tschanchain nus: Il sturn vegniva protegì da stretg d'ina stupenta guardia del corpo feminina; diciamo: vegniva protegì, vegniva er erigi, eh, dirigì da la medema guardia del corpo. Bungabunga cun semper novas modellas, Rubi(cuore). Dastgan betg esser minorennas u maiorennas. Tran-



teren è adina bun, passa la lescha. Il chivo ha chatschà al spitg cun ellas ed en ellas e tras ellas, naging segund ha cun tantas danor il Borgia pli tard papa Alexander VI, el è bun davent.

Nus la ministra per affars externs essan ans scuntrada cun Muammar diversas giadas, cun gronda probabilitad è el mort, lain nus ussa betg giubilar. Nus ans mettain betg en ritscha cun tschels gratulants, betg tar quellas gratulaziuns. Qua sin mes mobilefon hai jau massa bellas fotos. Quella sun jau cun vel alv davant Muammar, conusch'ins bain, avess er gi in cotschen u oransch en mia cofra da ministra. Auters pajais, auters gusts, mentalitads. Nossa neutralitad è in'au- tra, Frau Calmy, dain nus betg nà sco in vel, sco ina pel virginala!, di noss bab dieu, nossa figura da bab dominante. El è davent. El

ha adina vulì davent mai. Proximamain sun jau davent, cun high heels nova frisura en la bainmeritada pensiun, mia ultima davosa fermata.

Nus grondezzas statalas enturn la Libia essan stads superamis da Muammar, il temp ch'el viveva. Uss è el davent, vegni colportà e rapportà ch'el saja. Nus schain navidis il sturn è mort, i vivia il sturn! La vita na vegn betg prendida mo midada, quella giada na stoi betg esser! El è bun davent. Nus vairs amis u amis apparents, er egal, avain al embratschà, fatg da fratelli e sorelle cumpani u co ch'ins di a quai, sco quai ch'i vegn fatg sumegliantamain abundantamain er en la scena litterara actuala, proximamain als Dis. Giae e guardai, i sa paja.

Nus megliers amis apparents, Scheinfreunde sind doch auch Freunde, oder? essan ans scuntrads baingugent cun al-Muammar, tant ord ses interess sco noss interess. Interess d'allianzas interessantas, formar bunas sugas. Faschais vus creacultura e litteratura gea er, nus er. El è probabel mort, e probabel liquidà da vivents. In malvesi è puspè davent. Davent è davent.